



Broj: 01/1-50-1-1-32/08
Sarajevo, 25.2.2008.godine

Z A P I S N I K

32. sjednice Ustavnopravne komisije

Sjednica je održana 25.2.2008., s početkom u 10 sati.

Sjednici su prisustvovali članovi Komisije: Šefik Džaferović, Lazar Prodanović, Drago Kalabić, Momčilo Novaković, Adem Huskić, Velimir Jukić i Martin Raguž.

Odsustvo su opravdali Ekrem Ajanović i Halid Genjac.

Osim članova Komisije, sjednici su prisustvovali i predstavnici: Centralne izborne komisije BiH Vedran Hadžović, Irena Hadžabić, Stjepan Mikić i Branko Petrić, Ministarstva pravde BiH Fazila Musić i Jusuf Halilagić, OHR-a Damir Gnjidić i Mari Katayanagi, OSCE-a Hajro Pošković, novinske agencije FENA Fedžad Forto, poslanik Jerko Ivanković Lijanović, zamjenik predsjedavajućeg Predstavničkog doma PSBiH Beriz Belkić, Savjetnik predsjedavajućeg Predstavničkog doma PSBiH Igor Bunić i stažista u Klubu poslanika HDZ-a Semir Mujkanović.

Sjednici je prisustvovao i sekretar Komisije Igor Bajić i stručni saradnik u Ustavnoj komisiji Nedžad Salman.

O predloženom dnevnom redu nije bilo rasprave. Komisija je jednoglasno usvojila predloženi

D N E V N I R E D

1. Usvajanje Zapisnika 31. sjednice, održane 18.2.2008.;
2. Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine, predlagač: Vijeće ministara BiH (**postupak u nadležnoj komisiji u skladu s članom 110. Poslovnika Doma**);
3. Prijedlog zakona o izmjenama i dopunama Izbornog zakona BiH, predlagači: poslanici Šefik Džaferović, Niko Lozančić i Milorad Živković (**postupak u nadležnoj komisiji u skladu s članom 110. Poslovnika Doma**);
4. **Ostala pitanja:**
 - Zahtjev Ustavnog suda BiH za mišljenje o Zahtjevu za pokretanje ustavnopravnog spora – ocjeni ustavnosti Zakona o statistici BiH („Službeni glasnik BiH“, br. 26/04) i Zakona o izmjeni i dopuni Zakona o statistici BiH („Službeni glasnik BiH“, br. 42/04), podnosioca Milorada Živkovića koji je u vrijeme podnošenja bio prvi zamjenik predsjedavajućeg Predstavničkog doma Parlamentarne skupštine BiH (**razmatranje zahtjeva u skladu s članom 41. stav (1) tačka g) Poslovnika Doma**);
 - Zahtjev Ustavnog suda BiH za mišljenje o Zahtjevu za pokretanje ustavnopravnog spora – ocjeni ustavnosti Zakona o javnim nabavkama BiH („Službeni glasnik BiH“, br. 49/04) i Zakona o izmjenama Zakona o javnim nabavkama BiH („Službeni glasnik BiH“, broj: 24/06) podnosioca Milorada Živkovića koji je u vrijeme podnošenja bio prvi zamjenik Predsjedavajućeg Predstavničkog doma Parlamentarne skupštine BiH (**razmatranje zahtjeva u skladu s članom 41. stav (1) tačka g) Poslovnika Doma**).

- Obavještenje o otkazivanju javne rasprave o Prijedlogu zakona o denacionalizaciji (**razmatranje u skladu s članom 41. stav (2) u vezi s članom 114. Poslovnika Doma**).

Ad. 1. Usvajanje Zapisnika 31. sjednice, održane 18.2.2008.

S obzirom da nije bilo rasprave, Komisija je jednoglasno usvojila Zapisnik 31. sjednice.

Ad. 2. Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine, predlađač: Vijeće ministara BiH (postupak u nadležnoj komisiji u skladu s članom 110. Poslovnika Doma)

S obzirom da Vijeće ministara BiH nije dostavilo mišljenje o amandmanima poslanika Sadika Ahmetovića, predsjedavajući je predložio da Komisija ipak raspravlja o Prijedlogu zakona imajući u vidu da je Kolegij Doma već jednom produžio rok za dostavljanje Izvještaja Komisije. Komisija je, s pet glasova „za“, dva glasa „protiv“ i bez „suzdržanih „glasova“, prihvatila navedeni prijedlog.

Predsjedavajući je otvorio raspravu u kojoj su učestvovali: Jusuf Halilagić, Fazila Musić, Momčilo Novaković, Velimir Jukić i Šefik Džaferović.

Nakon rasprave, Komisija, s dva glasa „za“, pet glasova „protiv“ i bez „suzdržanih“ glasova, nije prihvatila nijedan od dva predložena amandmana.

Nakon toga Komisija je, sa šest glasova „za“, jednim glasom „protiv“ i bez „suzdržanih“ glasova, prihvatila tekst Prijedloga zakona o izmjenama i dopunama Zakona o upotrebi i zaštiti naziva Bosne i Hercegovine koji je utvrdilo Vijeće ministara BiH.

Ad. 3. Prijedlog zakona o izmjenama i dopunama Izbornog zakona BiH, predlađači: poslanici Šefik Džaferović, Niko Lozanić i Milorad Živković (postupak u nadležnoj komisiji u skladu s članom 110. Poslovnika Doma)

Predsjedavajući je otvorio raspravu u kojoj su učestvovali svi članovi Komisije, Vedran Hadžović, Branko Petrić, Irena Hadžabić.

Nakon rasprave predsjedavajući je predložio pauzu za ručak u trajanju od 40 minuta.

Poslije pauze predsjedavajući je informirao članove Komisije da Dom naroda PSBiH, na današnjoj sjednici, nije usvojio Prijedlog zakona o denacionalizaciji te je predložio da Komisija odmah odluči o otkazivanju održavanja javne rasprave o Prijedlogu zakona o denacionalizaciji, zakazane za 26. 2.2008., jer je očigledno da njeno održavanje sada nije svrsishodno jer ovaj prijedlog zakona više nije u zakonodavnoj proceduri.

Komisija je jednoglasno podržala navedeni prijedlog kao i da se ovo pitanje uvrsti kao posebna tačka usvojenog dnevnog reda.

Nakon pauze, predstavnici Centralne izborne komisije BiH izjasnili su se o preostalim amandmanima.

Prije odlučivanja i glasanja o amandmanima, jednoglasno je prihvaćen prijedlog da se u petak, 29.2.2008., održi nastavak sjednice Komisije, s početkom u 9 sati, kako bi Centralna izborna komisija BiH mogla sačiniti i do četvrtka, 28. 2. 2008., Komisiji dostaviti pisani izvještaj o prihvatanju, neprihvatanju i modifikaciji predloženih amandmanima. Ovim bi se članovima Komisije omogućio potpuniji uvid u sve predložene amandmane i stavove Centralne izborne komisije BiH što bi olakšalo i glasanje o amandmanima i Prijedlogu zakona u cijelini.

Nastavak sjednice, 29.2.2008., počeo je u 9 sati.

Nastavku sjednice prisustvovali su članovi Komisije: Šefik Džaferović, Drago Kalabić, Martin Raguz, Ekrem Ajanović, Halid Genjac, Adem Huskić, Velimir Jukić, Momčilo Novaković i Lazar Prodanović.

Osim članova Komisije, sjednici su prisustvovali i predstavnici: Centralne izborne komisije BiH Vedran Hadžović, Irena Hadžić, Stjepan Mikić i Branko Petrić, Ministarstva pravde BiH Fazila Musić i Jusuf Halilagić, OHR-a Damir Gnjidić i Mari Katayanagi, OSCE-a Hajro Pošković, novinske agencije FENA Fedžad Forto, poslanici Sadik Ahmetović, Remzija Kadrić, zamjenik predsjedavajućeg Predstavničkog doma PSBiH Beriz Belkić, sekretar Predstavničkog doma Branka Todorović, savjetnik predsjedavajućeg Predstavničkog doma PSBiH Igor Bunić i stažista u Klubu poslanika HDZ-a Semir Mujkanović.

Sjednici je prisustvovao i sekretar Komisije Igor Bajić i stručni saradnik u Ustavnoj komisiji Nedžad Salman.

Predsjedavajući je otvorio raspravu o Prijedlogu zakona o izmjenama i dopunama Izbornog zakona BiH dajući rječ članovima Centralne izborne komisije BiH koji su ponovili stavove o podnesenim amandmanima.

Nakon duže rasprave, Komisija je glasala o amandmanima kako slijedi:

Poslanik Sadik Ahmetović:

AMANDMAN I.

Član 18. mijenja se i glasi: U članu 3.5. na kraju teksta dodaje se novi stav (9) koji glasi: „ Državljeni Bosne i Hercegovine koji imaju biračko pravo, a koji su, prema posljednjem popisu stanovništva u Bosni i Hercegovini, imali prebivalište na području općine Srebrenica, imaju pravo upisa u birački spisak za tu općinu, bez obzira na sadašnji status i prebivalište“.

Stav: CIK-a: Ne može se izjasniti – političko pitanje - tehnički provodiv.

S dva glasa „za“, tri glasa „protiv“ i četiri „ suzdržana“ glasa , Amandman nije prihvaćen

Poslanik Beriz Belkić:

AMANDMAN I.

Modificiran: U članu 3.15. stav (3) tačka c) riječ „prebivalištu“ zamjenjuje se riječima: „promjeni prebivališta“.

Stav: CIK-a: Prihvata se i predlaže identična modifikacija.

Amandman je, s četiri glasa „za“, tri glasa „protiv“ i dva „ suzdržana“ glasa, prihvaćen.

AMANDMAN II.

Iza člana 3.15. dodaje se novi član 3.15.a. koji glasi:

„ Nakon donošenja odluke o održavanju neposrednih izbora u BiH, Centralna izborna komisija BiH će svim biračima koji su na prethodno provedenim izborima u BiH bili upisani u izvod iz Centralnog biračkog spiska za glasanje poštom, kao i državljana BiH koji se vode u evidenciji izdatih putnih isprava države BiH, a nalaze se u inozemstvu, dostaviti obrazac prijave za glasanje van Bosne i Hercegovine.

Obrazac prijave dostavlja se poštom na adresu koju su birači dostavili prilikom posljednje prijave za glasanje van BiH ili na drugu (prethodno ažuriranu) adresu o čijoj izmjeni je birač

obavijestio Centralnu izbornu komisiju BiH, a u slučaju državljana BiH koji se nalaze u evidenciji izdatih isprava na adresu koju dostavi nadležni državni organ koji vodi evidenciju.“
 Stav: CIK-a : Prihvatljiv i tehnički provodiv - Njime se proširuje obaveza Centralne izborne komisije BiH upućivanja prijavnog obrasca i izbjeglim licima koje se nalaze u evidenciji putnih isprava.

Sa tri glasa „za“, tri glasa „protiv“ i tri „ suzdržana“ glasa, Amandman nije prihvaćen.

Poslanik Šefik Džaferović:

AMANDMAN I.

Iza člana 13.1. dodaje se novi član 13.1.a) koji glasi:

"13.1.a)

- (1) Sastav izabranog općinskog vijeća, odnosno skupštine općine, gradskog vijeća odnosno skupštine grada, treba da održava strukturu stanovništva date općine odnosno grada, prema popisu stanovništva u Bosni i Hercegovini iz 1991. godine uz maksimalno dozvoljeno odstupanje + - 20% .
- (2) U slučaju da sastav izabranog općinskog vijeća, odnosno skupštine općine gradskog vijeća, odnosno skupštine grada nije u skladu sa stavom (1) ovog člana, Centralna izborna komisija BiH izvršit će dodjelu mandata, prema redoslijedu na kandidatskoj listi političke stranke koja je dobila mandate, onim kandidatima s najvećim količnikom, kojim će se osigurati da sastav izabranog općinskog vijeća, odnosno skupštine općine ili gradskog vijeća, odnosno skupštine grada odgovara strukturi iz stava (1) ovog člana.
- (3) Ukoliko se ni postupkom iz stava (2) ovog člana ne može osigurati struktura iz stava(1) ovog člana, Centralna izborna komisija BiH dodijelit će mandat političkoj stranci s najvećim količnikom koja ima kandidata s kojim će se to osigurati.

Stav: CIK-a: Ne može se izjasniti – političko pitanje - tehnički provodiv.

Sa četiri glasa „za“, četiri glasa „protiv“ i jednim „ suzdržanim“ glasom, Amandman nije prihvaćen.

Poslanik Halid Genjac:

AMANDMAN I.

Član 5. mijenja se i glasi:

„ U članu 1.5 stav (2) mijenja se i glasi: Državljanin Bosne i Hercegovine, koji privremeno živi u inozemstvu i ima biračko pravo, ima pravo glasati lično (dolaskom na odgovarajuće biračko mjesto u BiH ili u diplomatsko-konzularnom predstvaništvu BiH u inozemstvu) ili poštom (slanjem glasačkog listića poštom) za općinu u kojoj je imao prebivalište prije odlaska u inozemstvo, ako u toj općini ima prijavljeno prebivalište u trenutku podnošenja prijave za glasanje van zemlje.

U članu 5. dodaju se novi st. (3), (4) i (5) koji glase:

- (3) Centralna izborna komisija BiH će posebnim propisom, u skladu s ovim zakonom, regulirati kompletan postupak glasanja u diplomatsko-konzularnom predstvaništvu BiH (postupak i rokove prijavljivanja za glasanje, imenovanje biračkih odbora, utvrđivanje broja i rasporeda biračkih mjesta i postupak provođenja izbora).
- (4) Centralna izborna komisija BiH će broj i raspored biračkih mjesta u diplomatsko-konzularnim predstvaništvima BiH utvrditi prema kriterijima iz člana 5.2 ovog zakona.

(5) Centralna izborna komisija BiH imenovat će biračke odbore za glasanje u diplomatsko – konzularnim predstavništvima BiH tako da se u svakom biračkom odboru osigura zastupljenost članova iz svakog konstitutivnog naroda .“

Sa osam glasova „za“, bez glasova „protiv“ i jednim „ suzdržanim“ glasom“, Amandman je prihvaćen.

AMANDMAN II.

Član 9. briše se.

Stav: CIK-a: Nije privatljiv. Predlaže modifikaciju koja bi glasila: Član 9. mijenja se i glasi: U članu 2.3. u stavu (1) tačka 4) mijenja se i glasi: „koje je kandidat za izbore koji se provode kao ni lice koje je kandidat na listi političkog subjekta koji je dobio mandat.“

Modifikacija nije prihvaćena jer to jasno i logično proizilazi i iz odredbi postojećeg zakona. Ta lica na izborima koji se provode ne mogu biti članovi izbornih komisija.

Amandman je, s osam glasova „za“, bez glasova „protiv“ i jednim „ suzdržanim“ glasom“, prihvaćen.

AMANDMAN III.

Član 10. briše se.

Stav: CIK-a: Ne prihvata se.

Bez glasova „za“, sa šest glasova „protiv“ i tri „ suzdržana“ glasa, Amandman nije prihvaćen.

AMANDMAN IV.

U članu 16. u stavu (1) nakon riječi: „45 dana,, preostali tekst briše se.

Stav: CIK-a: Ne prihvata se.

Poslanik Halid Genjac povukao je amandman.

AMANDMAN V.

U članu 20. u tekstu novog člana 3.12a riječi: „45 dana prije održavanja izbora“ zamjenjuju se riječima: „u periodu od 45 dana prije održavanja izbora do dana održavanja izbora.“

Stav: CIK-a: Prihvata se.

Amandman je, s osam glasova „za“, bez glasova „protiv“ i jednim „ suzdržanim“ glasom“, prihvaćen.

AMANDMAN VI.

Član 22. mijenja se i glasi:

U članu 3.15 na kraju stava (1) prije tačke dodaju se riječi: “te izjašnjenje o opciji glasanja: u DKP-u ili poštom“.

U istom članu u stavu (2) na kraju prethodnje rečenice dodaju se riječi: „te sadržavati izjašnjenje o opciji glasanja: u DKP-u ili poštom.“

Ostali tekst člana 22. ostaje nepromijenjen.

Stav: CIK-a: Prihvata se.

Amandman je, s osam glasova „za“, bez glasova „protiv“ i jednim „ suzdržanim“ glasom, prihvaćen.

AMANDMAN VII.

U članu 29. u stavu (1) brišu se riječi: „nacionalnost i „.

Stav: CIK-a: Ne prihvata se. Izjašnjenje o nacionalnoj pripadnosti za nezavisne kandidate potrebno je predvidjeti. U postojećem zakonu, u članu 4.19. stav (6), ova obaveza predviđena je za kandidate političkih stranaka i koalicija.

Poslanik Halid Genjac povukao je amandman.

AMANDMAN VIII

U članu 35. stav (2.) mijenja se i glasi:

„U članu 4.24 dodaje se novi stav (3) koji glasi:

“ Kandidatska lista za kompenzacione mandate mora sadržavati broj imena kandidata koji je između 30% i 100% od ukupnog broja mandata koji se dodjeljuju s područja entiteta za izborni nivo za koji je sačinjena lista.”

Dosadašnji stav (3) postaje stav (4).

Stav: CIK-a: Ne prihvata se. Predloženim rješenjem daje se mogućnost da se na kompenzacionim listama nađu svi ovjereni kandidati s redovnih lista za isti nivo vlasti.

S jednim glasom „za“, pet glasova „protiv“ i tri „ suzdržana“ glasa, Amandman nije prihvaćen.

AMANDMAN IX.

Član 38 . briše se.

Stav: CIK-a: Ne prihvata se. Dosadašnje iskustvo s javnim konkursom nije dalo dobre rezultate.

S dva glasa „za“, četiri glasa „protiv“ i dva „ suzdržana“ glasa“, Amandman nije prihvaćen.

AMANDMAN X.

Član 41. mijenja se i glasi: Član 5.28 stav (1) glasi:

„ Da bi bila prihvatljiva, svaka pojedinačna koverta s glasačkim listićem mora imati poštanski žig zemlje iz koje se glasa s datumom ne kasnijim od datuma održavanja izbora „

Stav: CIK-a: Prihvatljiv. Njime se nudi preciznija norma.

Amandman je, s osam glasova „za“, bez glasova „protiv“ i jednim „ suzdržanim“ glasom, prihvaćen.

AMANDMAN XI.

Iza podnaslova:“Poglavlje 13. Kantonalne skupštine , općinska vijeća, odnosno skupštine općina i gradska vijeća, odnosno skupštine grada“ dodaje se novi član 58c. koji glasi:

„Član 58.c

„ U članu 13.5 dodaju se st. (2), (3) i (4) glase:

(2) Raspodjela mandata za gradska vijeća, odnosno skupštine grada, gdje to nije riješeno statutima grada ili posebnim odredbama ovog zakona ,vrši se u skladu s članom 9.5 ovog zakona pri čemu se osigurava najmanje po jedan garantirani mandat za predstavnika svakog konstitutivnog naroda koji, prema posljednjem popisu stanovništva u BiH, u ukupnom broju stanovništva grada učestvuje s više od 3%.

(3) Raspodjela mandata za općinsko vijeće, odnosno skupštinu općine vrši se u skladu s članom 9.5 ovog zakona pri čemu se osigurava najmanje po jedan garantirani mandat za predstavnika svakog konstitutivnog naroda koji, prema posljednjem popisu stanovništva u BiH, u ukupnom broju stanovništva učestvuje s više od 3%.

(4) U slučaju da sastav izabranog gradskog vijeća, odnosno skupštine grada ili općinskog vijeća, odnosno skupštine općine nije u skladu sa stavom (2) ili stavom (3) ovog člana, Centralna izborna komisija BiH će posljednji mandat (ako nedostaje predstavnik jednog konstitutivnog naroda) ili posljednja dva mandata (ako nedostaju predstavnici dva konstitutivna naroda) dodijeliti političkom subjektu ili političkim subjektima s najvećim količnikom, bez obzira na cenzus od 3% , koji na listi ima/imaju kandidata/kandidate s kojima će se osigurati kvote iz stava (2) ili stava (3) ovog člana.”

Raniji stavovi (2), (3) i (4) postaju stavovi (5), (6) i (7).“

Nakon stava (7) dodaje se novi stav (8) koji glasi:

"Izuzetno od odredbi stava (7) ovog člana, raspodjela mandata za kantonalnu skupštinu vrši se tako da se osigura najmanje po jedan mandat pripadniku svakog konstitutivnog naroda u sastavu kantonalne skupštine u skladu sa stavom (4) ovog člana."

Stav: CIK-a: Ne može se izjasniti – političko pitanje - tehnički provodiv.

Amandman je, s pet glasova „za“, bez glasova „protiv“ i tri „suzdržana“ glasa“, prihvaćen.

AMANDMAN XII.

Član 57. mijenja se i glasi:

„U članu 9.10 na kraju stava (1) dodaje se rečenica: "U slučaju da se iscrpi lista kompenzacijskih mandata, postupa se prema odredbama 9.7a ovog zakona“.

Stav: CIK-a: Nije prihvatljiv.

Poslanik Halid Genjac povukao je amandman.

AMANDMAN XIII.

Iza člana 58. dodaje se član 58a. koji glasi :

„Član 58a.

U članu 10.6. na kraju stava (1) dodaje se rečenica: "Ukoliko se lista iscrpi, primjenjuju se odredbe člana 9.7a ovog zakona."

Stav: CIK-a: Nije prihvatljiv.

Poslanik Halid Genjac povukao je amandman.

AMANDMAN XIV.

Iz člana 58a. dodaje se novi član 58b. koji glasi

„ Član 58b.

U članu 11.6 na kraju stava (1) dodaje se rečenica: "Ukoliko se lista iscrpi, primjenjuju se odredbe člana 9.7a ovog zakona."

Stav: CIK-a: Nije prihvatljiv.

Poslanik Halid Genjac povukao je amandman.

AMANDMAN XV.

U članu 60. u članu 13.7. u stavovima (2) i (3) iza riječi: „u skladu“ a ispred riječi: „entitetskim zakonom“ dodaju se riječi: „ovim zakonom.“

Nakon stava (3) dodaje se novi stav (4) koji glasi:

„Centralna izborna komisija BiH utvrđuje izgled glasačkog listića za izbor načelnika, odnosno gradonačelnika koji se bira neposredno.“

Stav: CIK-a: Prihvatljiv je stav (1) ovog amandmana, stav (2) nije prihvatljiv, jer je to u nadležnosti Centralne izborne komisije BiH (postojeći član 2.9. stav (1) tačka 8. Izbornog zakona BiH)..

Poslanik Halid Genjac prihvatio je predloženu modifikaciju amandmana koja glasi:

U članu 60. u članu 13.7. u stavovima (2) i (3) iza riječi: „u skladu“ a ispred riječi: „entitetskim zakonom“ dodaju se riječi: „ovim zakonom.“

Amandman je, sa sedam glasova „za“, bez glasova „protiv“ i dva „suzdržana“ glasa, prihvaćen.

AMANDMAN XVI.

U članu 64. u članu 13.14 na kraju stava (2) dodaju se riječi:

„ pri čemu se pripadnicima svih nacionalnih manjina koji u ukupnom broju stanovništva te izborne jedinice, prema posljednjem popisu stanovništva, učestvuju s više od 3% garantira najmanje jedno mjesto. “

U članu 13.14 na kraju stava (3) dodaje se tekst:

“Izuzetno od odredbi člana 4.4 tačka 5) i tačka 6) i odredbi člana 4.8. tačka 5) i tačka 6) , političke stranke i nezavisni kandidati da bi se ovjerili za učešće na izborima za popunjavanje garantiranih mandata za pripadnika nacionalnih manjina u općinskom vijeću, odnosno skupštini općine i gradskom vijeću, odnosno skupštini grada, podnose Centralnoj izbornoj komisiji BiH prijavu za učešće na izborima koja sadrži najmanje 40 potpisa birača upisanih u Centralni birački spisak u toj izbornoj jedinici. Političke stranke koje su prijavile listu za redovne mandate ne mogu prijaviti listu za garantirane mandate za pripadnike nacionalnih manjina.“

U članu 13.14 u stavu (13) riječi: “stav (3)” brišu se .

Stav: CIK-a: Ne može se izjasniti – političko pitanje - tehnički provodiv. Ne bi trebalo prihvatiti posljednju rečenicu stava (2) kojom se uskraćuje pravo političkim strankama da učestvuju u kandidiranju za redovne mandate i za mandate nacionalnih manjina.

Poslanik Halid Genjac prihvatio je predloženu modifikaciju amandmana koja glasi:

U članu 64. u članu 13.14 na kraju stava (2) dodaju se riječi:

„ pri čemu se pripadnicima svih nacionalnih manjina koji u ukupnom broju stanovništva te izborne jedinice, prema posljednjem popisu stanovništva, učestvuju s više od 3% garantira najmanje jedno mjesto. “

Amandman je, s devet glasova „za“, bez glasova „protiv“ i bez „ suzdržanih“ glasova, prihvaćen.

AMANDMAN XVII.

U članu 77. u članu 19. 8. na početku stava (1) dodaju se riječi:

„Odlukom Izborne komisije Bosne i Hercegovine“

U članu 77. u članu 19. 8. u stavu (1) tačka m) glasi:

“ Odlukom općinske izborne komisije novčanom kaznom u iznosu od 200 KM do 1.000 KM kaznit će se angažirani u izbornoj administraciji za povredu, ako zapisnik o radu biračkog odbora ne sadrži podatke propisane ovim zakonom (član 5.7) .“

Stav: CIK-a: Ne prihvata se. Predstavlja drugačiji pristup ovoj materiji, ali i predviđaju nadležnost općinske izborne komisije za povrede koje su u nadležnosti Centralne izborne komisije BiH i obratno.

Poslanik Halid Genjac povukao je amandman.

AMANDMAN XVIII.

U članu 77., u članu 19.9 na početku stava (1) dodaju se riječi:

„ Odlukom Izborne komisije Bosne i Hercegovine ...“

Stav: CIK-a: Ne prihvata se. Predstavlja drugačiji pristup ovoj materiji, ali i predviđaju nadležnost općinske izborne komisije za povrede koje su u nadležnosti Centralne izborne komisije BiH i obratno.

Poslanik Halid Genjac povukao je amandman.

AMANDMAN XIX.

U članu 77. , u članu 19.9 stav (5) mijenja se i glasi:

„Ukoliko počine povrede iz stava (1) tačka d), h) i i) ovog člana, kaznit će se i zaposleni ili angažirani u izbornoj administraciji novčanom kaznom u iznosu od 200,00 KM do 1.000,00 KM.“

Stav: CIK-a: Ne prihvata se. Predstavlja drugačiji pristup ovoj materiji, ali i predviđaju nadležnost općinske izborne komisije za povrede koje su u nadležnosti Centralne izborne komisije BiH i obratno. Dopuniti amandman

Poslanik Halid Genjac povukao je amandman.

AMANDMAN XX.

Na kraju člana 77. dodaje se tekst koji glasi:

„ Član 19.11

Administrativna komisija Parlamentarne skupštine BiH odlučit će da se novčanom kaznom u iznosu od 200 KM do 5.000 KM kazne članovi Izborne komisije BiH za povredu odgovornosti Izborne komisije BiH iz članova 2.9, 3.5, 3.6, 3.7, 3.14, 5.4, 5.12, 5.14, 5.29 i člana 17.6 Izbornog zakona. “

Stav: CIK-a: Nije prihvatljiv. Odgovornost članova Centralne izborne komisije BiH utvrđena je u članu 2. 5. stav (8), a u vezi s članom 2.15 stav (1) Izbornog zakona BiH i članom 10. stav (3) Poslovnika Centralne izborne komisije BiH.

Poslanik Halid Genjac povukao je amandman.

Poslanik Jerko Ivanković Lijanović**AMANDMAN I.**

Član 16. briše se.

Stav: CIK-a: Nije prihvatljiv.

S tri glasa „za“, pet glasova „protiv“ i bez „ suzdržanih“ glasova, Amandman nije prihvaćen.

Poslanici Sadik Ahmetović i Remzija Kadrić**AMANDMAN I.**

Iza člana 57. dodaje se novi član 57a. koji glasi:

„Član 57a.

Odredbe člana 56. i 57. ovog zakona odnose se i na Narodnu skupštinu Republike Srpske i Predstavnički dom Federacije Bosne i Hercegovine“.

Stav: CIK-a: Nije prihvatljiv.

S dva glasa „za“, četiri glasa „protiv“ i dva „ suzdržana“ glasa, Amandman nije prihvaćen.

AMANDMAN II.

Iza člana 57a. dodaje se novi član 57b. koji glasi:

„Član 57b.

Odredbe članova 56. i 57. primjenjivat će se i na Opće izbore održane 2006. godine u Bosni i Hercegovini.“

Stav: CIK-a: modifikacija: U članu 79. u stavu (1) iza riječi: “20.12a” dodaje : “i 20.12b”

„Član 20.12b

Odredba člana 4.24 stav (3) ovog zakona primjenjivat će se na ovjerene kandidatske liste za učešće na neposrednim izborima održanim 1. oktobra 2006. godine.“

S četiri glasa „za“, četiri glasa „protiv“ i bez „ suzdržanih“ glasova, Amandman nije prihvaćen.

Poslanik Momčilo Novaković:**AMANDMAN I.**

Član 3. briše se.

Stav: CIK-a: Nije prihvatljiv.

Poslanik Momčilo Novaković povukao je amandman.

AMANDMAN II.

Član 5. briše se.

Stav: CIK-a: Ne može se izjasniti – političko pitanje.

Poslanik Momčilo Novaković povukao je amandman.

AMANDMAN III.

Član 9. briše se.

Stav: CIK-a: Nije prihvatljiv.

Poslanik Momčilo Novaković povukao je amandman.

AMANDMAN IV.

U članu 13. stav 2. briše se.

Stav: CIK-a: Nije prihvatljiv.

Poslanik Momčilo Novaković povukao je amandman.

AMANDMAN V.

Član 14. briše se, a u članu 2.13 stav (1) tačka 1) riječ „osigurava“ mijenja se riječju „kontrolira“.

Stav: CIK-a: Nije prihvatljiv.

Poslanik Momčilo Novaković povukao je amandman.

AMANDMAN VI.

Član 16. mijenja se i glasi: „U članu 2.19. stav (3) riječi: „30 dana“ zamjenjuju se riječima: „45 dana.“

Stav: CIK-a: Nije prihvatljiv.

Poslanik Momčilo Novaković povukao je amandman.

AMANDMAN VII.

U članu 22. novi stav (9) briše se.

Stav: CIK-a: Nije prihvatljiv.

Poslanik Momčilo Novaković povukao je amandman.

AMANDMAN VIII.

U članu 23. stav (1) mijenja se i glasi:

„iza riječi „dokazi“ dodaju se riječi: „koji nije stariji od 60 dana.“

Stav: CIK-a: Prihvatljiv.

Amandman je, sa sedam glasova „za“, bez glasova „protiv“ i dva „suzdržana“ glasa, prihvaćen.

AMANDMAN IX.

Član 24. glasi: „U članu 4.4. Izbornog zakona BiH nakon stava (2) dodaje se novi stav (3), koji glasi:

„tri hiljade potpisa birača upisanih u birački spisak za izbore predsjednika i potpredsjednika Republike Srpske.“

U istom članu u stavu (5) u tački 1) broj: „3.000“ zamjenjuje se brojem: „5.000.“

„(2) tri hiljade potpisa birača upisanih u birački spisak za izbore predsjednika i potpredsjednika Republike Srpske.

Stav: CIK-a: Ne može se izjasniti – političko pitanje.

S četiri glasa „za“, pet glasova „protiv“ i bez „suzdržanih“ glasova, Amandman nije prihvaćen.

AMANDMAN X.

U članu 28. na kraju teksta interpunkcijski znak zamjenjuje se zarezom, te se dodaje sljedeći tekst:

„, predsjednika i potpredsjednika Republike Srpske.“

Stav: CIK-a: Prihvatljiv.

Amandman je, sa sedam glasova „za“, bez glasova „protiv“ i jednim „suzdržanim“ glasom, prihvaćen.

AMANDMAN XI.

Član 56. briše se.

Stav: CIK-a: Prihvatljiv je. S aspekta potrebe da prije dana održavanja izbora budu poznati svi izborni elementi, pa i imena i redoslijed na kompenzacionim listama.

Amandman je, s osam glasova „za“, bez glasova „protiv“ i bez „suzdržanih“ glasova, prihvaćen.

AMANDMAN XII.

Član 57. briše se.

Stav: CIK-a: Nije prihvatljiv u predloženom tekstu.

Ovaj amandman treba modificirati tako da glasi: Član 57. Prijedloga zakona mijenja se i glasi: „U članu 9. 10. u stavu (2) u drugoj rečenici riječi: „mandat ostaje upražnjen do sljedećih redovno raspisanih izbora“ zamjenjuju se riječima: „mandat se dodjeljuje kandidatskoj listi političkog subjekta s najvećim količnikom iste izborne jedinice“.

Poslanik Momčilo Novaković prihvatio je modifikaciju amandmana.

Amandman je, sa šest glasova „za“, bez glasova „protiv“ i dva „suzdržana“ glasa, prihvaćen.

AMANDMAN XIII.

Član 64. glasi: „U članu 13.14 Izbornog zakona BiH stavovi (1) i (2) brišu se.“

Stav: CIK-a: Ne može se izjasniti – političko pitanje. Slična koncepcija iznesena je u Amandmanu XVI. poslanika Halida Genjca.

Poslanik Momčilo Novaković povukao je amandman.

AMANDMAN XIV.

U članu 67. u stavu (2) riječi: „za period koji počinje tri mjeseca prije početka roka za podnošenje prijave za ovjeru“ zamjenjuju se riječima: „za period koji počinje 17 mjeseci prije početka roka za podnošenje prijave za ovjeru.“

Stav: CIK-a: Nije prihvatljiv. Politička stranka koja ne podnese finansijski izvještaj za kalendarsku godinu koja prethodi izborima neće moći biti ovjerena za izbore, u skladu s odredbama Zakona o finansiranju političkih stranaka.

Poslanik Momčilo Novaković povukao je amandman.

Poslanik Milorad Živković**AMANDMAN I**

Član 5. briše se.

Stav: CIK-a: Ne može se izjasniti – političko pitanje.

S tri glasa „za“, pet glasova „protiv“ i bez „suzdržanih“ glasova, Amandman nije prihvaćen.

AMANDMAN II.

Član 79. briše se.

Stav: CIK-a: Ne može se izjasniti – političko pitanje.

S tri glasa „za“, pet glasova „protiv“ i bez „suzdržanih“ glasova, Amandman nije prihvaćen.

AMANDMAN III.

Član 9.3. mijenja se i glasi:

“Devet mandata iz tri višečlane izborne jedinice za Predstavnički dom Parlamentarne skupštine Bosne i Hercegovine, s teritorije Republike Srpske, raspodjeljuju se na sljedeći način: Izborna jedinica I sastoji se od općina: Krupa na Uni, Novi Grad, Kozarska Dubica, Prijedor, Gradiška, Laktaši, Srbac, Prnjavor, Petrovac, Oštra Luka, Banja Luka, Čelinac, Istočni Drvar, Ribnik, Mrkonjić Grad, Jezero, Kneževo, Kotor Varoš, Šipovo, Kupres i Kostajnica i bira tri člana.

Izborna jedinica II sastoji se od općina: Derventa, Brod, Vukosavlje, Šamac, Donji Žabar, Modriča, Pelagićevo, Bijeljina, Doboj, Petrovo, Lopare, Ugljevik i Teslić, i Brčko Distrikta BiH i bira tri člana.

Izborna jedinica IV sastoji se od općina: Osmaci, Zvornik, Šekovići, Vlasenica, Bratunac, Srebrenica, Sokolac, Han Pijesak, Istočna Ilidža, Istočni Stari Grad, Istočno Novo Sarajevo, Trnovo, Pale, Rogatica, Višegrad, Istočni Mostar, Nevesinje, Kalinovik, Gacko, Foča, Novo Goražde, Čajniče, Rudo, Berkovići, Ljubinje, Bileća, Trebinje i Milići, i bira tri člana.”

Stav: CIK-a: Ne može se izjasniti – političko pitanje.

S tri glasa „za“, pet glasova „protiv“ i bez „suzdržanih“ glasova, Amandman nije prihvaćen.

AMANDMAN IV.

U članu 20.13, stav (18) mijenja se i glasi:

„Izborna jedinica I sastoji se od općina: Krupa na Uni, Novi Grad, Kozarska Dubica, Prijedor, Gradiška, Laktaši, Srbac, Prnjavor, Petrovac, Oštra Luka i Kostajnica i bira 13 članova.“

Stav (19) mijenja se i glasi :

“Izborna jedinica II sastoji se od općina: Petrovac, Banja Luka, Čelinac, Istočni Drvar, Ribnik, Mrkonjić Grad, Jezero, Kneževo, Kotor Varoš, Šipovo i Kupres i bira 12 članova.”

Stav (20) mijenja se i glasi :

“Izborna zborna jedinica III sastoji se od općina: Derventa, Brod, Vukosavlje, Modriča, Doboj, Petrovo i Teslić i bira 10 članova.”

Stav (21) mijenja se i glasi :

“Izborna jedinica IV sastoji se od općina : Šamac, Donji Žabar, Pelagićevo, Bijeljina, Lopare, Ugljevik, te birača Brčko Distrikta BiH koji su upisani u Centralni birački spisak za glasanje u Republici Srpskoj i bira devet članova.”

Stav (22) mijenja se i glasi :

“Izborna jedinica V sastoji se od općina: Osmaci, Zvornik, Šekovići, Vlasenica, Bratunac, Srebrenica, Sokolac, Han Pijesak, Istočna Ilidža, Istočni Stari Grad, Istočno Novo Sarajevo, Trnovo, Pale, Rogatica i Milići, i bira 11 članova.”

Stav (23) mijenja se i glasi :

“Izborna jedinica VI sastoji se od općina: Višegrad, Istočni Mostar, Nevesinje, Kalinovik, Gacko, Foča, Novo Goražde, Čajniče, Rudo, Berkovići, Ljubinje, Bileća i Trebinje i bira sedam članova.”

Stav: CIK-a: Ne može se izjasniti – političko pitanje.

S tri glasa „za“, pet glasova „protiv“ i bez „suzdržanih“ glasova, Amandman nije prihvaćen.

Na kraju rasprave Komisija je, s pet glasova „za“, bez glasova „protiv“ i tri „suzdržana“ glasa, odlučila sljedeće:

- Ustavnopravna komisija prihvata tekst Prijedloga zakona o izmjenama i dopunama Izbornog zakona BiH sa usvojenim amandmanima te predlaže Predstavničkom domu njegovo usvajanje.
- Nakon toga Komisija je jednoglasno konstatirala da je, nakon usvajanja ovog prijedloga zakona, potrebno da Centralna izborna komisija BiH odmah dostavi prečišćeni tekst Izbornog zakona BiH Predstavničkom domu Parlamentarne skupštine BiH.
- Za izvjestioca, u plenarnoj fazi, u skladu s članom 113. Poslovnika Predstavničkog doma Parlamentarne skupštine BiH, imenuje se predsjedavajući Komisije Šefik Džaferović.

Ad. 4. Zahtjev Ustavnog suda BiH za mišljenje o Zahtjevu za pokretanje ustavnopravnog spora - ocjeni ustavnosti Zakona o statistici BiH („Službeni glasnik BiH“, br. 26/04) i Zakona o izmjeni i dopuni Zakona o statistici BiH („Službeni glasnik BiH“, br. 42/04), podnosioca Milorada Živkovića koji je u vrijeme podnošenja bio prvi zamjenik predsjedavajućeg Predstavničkog doma Parlamentarne skupštine BiH (razmatranje zahtjeva u skladu s članom 41. stav (1) tačka g) Poslovnika Doma)

Parlamentarna skupština BiH je, 7.2.2008., primila Zahtjev Ustavnog suda BiH, broj: U-6/07, od 4.2.2008. za mišljenje o Zahtjevu za pokretanje ustavnopravnog spora - ocjeni ustavnosti ovog zakona. Nakon kraće rasprave Komisija je, s pet glasova „za“, tri glasa „protiv“ i bez „suzdržanih“, konstatirala da:

- je Zakon usvojen na sjednici Predstavničkog doma, održanoj 23.4.2004.;
- je Zakon usvojen na sjednici Doma naroda, održanoj 26.4.2004.;
- Ustavnopravna komisija ostaje na pozicijama usvojenog zakona.

Ad 5. Zahtjev Ustavnog suda BiH za mišljenje o Zahtjevu za pokretanje ustavnopravnog spora - ocjeni ustavnosti Zakona o javnim nabavkama BiH („Službeni glasnik BiH“, br. 49/04) i Zakona o izmjenama Zakona o javnim nabavkama BiH („Službeni glasnik BiH“, br. 24/06), podnosioca Milorada Živkovića koji je u vrijeme podnošenja bio prvi zamjenik predsjedavajućeg Predstavničkog doma Parlamentarne skupštine BiH (razmatranje zahtjeva u skladu s članom 41. stav (1) tačka g) Poslovnika Doma)

Parlamentarna skupština BiH je, 7.2.2008., primila Zahtjev Ustavnog suda BiH, broj: U-9/07, od 4.2.2008., za mišljenje o Zahtjevu za pokretanje ustavnopravnog spora - ocjeni ustavnosti Zakona o statistici BiH.

Nakon kraće rasprave Komisija je, s pet glasova „za“, tri glasa „protiv“ i bez „suzdržanih“, konstatirala da:

- je Zakon usvojen na sjednici Predstavničkog doma, održanoj 23.9.2004.;
- je Zakon usvojen na sjednici Doma naroda, održanoj 27.9.2004.;
- Ustavnopravna komisija ostaje na pozicijama usvojenog zakona.

Kako nije bilo više pitanja, sjednica je završena u 15, 30 sati.

SEKRETAR KOMISIJE
Igor Bajić

PREDSJEDAVAJUĆI KOMISIJE
Šefik Džaferović